

澄城縣志

地 170.149
37
部 = 6

澄城縣志卷二十三

藝文二

明

縣丞樂公遺愛碑

喬

自古張官置吏職思親民尤關承宣之重者莫要於丞聖朝混一益嚴茲選然欲求克勝是任者樂侯其人也侯名韶字九成世居江西臨川擢才異授是邑丞去歲夏六月署事慨然有顧縣治曩時徙於親鄰寨以奔走服役受制於時將詣都督府躬稟命復故治廨宇塵居尋就規繩官民兩便而無擾前編氓緣賦煩重逃亡者多侯招來耕墾安業自是疲瘵復蘇咸遂仰事俯育之願設法禁戢凶賊蔑肆殘害境內

澄城縣志

卷二十三

藝文二

一

晏然無狗偷鼠竊之警至於吏胥輩各能飭厲奉公罔或貪惰故庶務辦集視鄰邑爲首稱其戶籍於力高下衆寡不同仍品答等第科坐民無咨怨時有過軍於合備廩餼外或妄有需求執論拒止民無妄費之苦敬謁廟學增修摧圯延禮師儒教養後進日課月試以期人材有成頃遇亢旱割俸齋香懇禱諸神誠意感通如期而甘澍沾足及朔望必率集庠校儒士洎耆宿輩講經論史讀律俾人知趨善遠罪之方日必雞鳴冠帶詣公視事政務叢瑣必躬加剴裁若挈裘領處之靡不適當嗚呼侯之政績彰彰若此其賢於人遠甚民方感慕仰觀政成丁母喪而歸翌日耆老趙達等謁予因請爲文紀諸石謹摭所言姑述梗概銘曰侯方下車惠政寬徐恩

撫流離田墾荒蕪農修食足學興才育均賦平徭訟簡刑清
邦憲宣明人知遵行姦伏糾摘物無遁情善敦福慶惡摧鯨
橫風移俗易塗歌里詠六事斯全父母終天泣涕漣洏謝職
南還賢侯去矣孰繼芳軌勒銘貞珉甘棠並美洪武三年歲
次庚戌十月吉日古雍前鄉進士喬

撰

王公重建廟學記

蒲城進士趙寅

洪惟我皇明統一八表肇興文治立庠序以敦育才之本開
科目以宏取才之規蓋紹隆唐虞三代於千古也明詔誕頒
四方風動自京都以逮郡縣罔不崇廟後學祇承德意而世
道翕然丕變矣澄城爲關輔名邑宣聖祠宇歷代增修厥制
雄偉載諸宋金有元之記曩因兵燹游臻更弛於教養賢廊

澄城縣志

卷二十三

藝文二

二

儒館舉就傾圮獨遺禮殿亦穿露弗支神不安妥游息無從
洪武六年春知縣王秩縣丞姚宗敬主簿夏安禮暨典史傅
榮相與言曰推功尙德勵民正俗舍尊孔子無以副上命而
殫臣職也僉謀旣協差旦于穀遂庀材用徵工役身爲程督
匪懈昕夕其簷棟欹撓者起之桷椽黯敗者易之做以宏庭
亢以豐陛黼辰巍然侑席儼若創構東西兩序計各六楹仍
繪七十二子及諸儒之像重門洞達繚垣峻整黝堊丹髹具
飭以法又闢堂筵齋室一區端大曠朗倍越疇昔凡十闕殆
鑿始克完美於是薦獻有位講習有居前廟後學輪奐聿新
觀禮懷和之民胥爲竦嘆矣饗薦戒期教諭王煥局使張元
禮拜手謁文請記其事嘗謂孔子之功與天地同大孔子之

祀與覆載無極堯舜禹湯既往道在洙泗立言垂訓儀範百王後世願治之君欲求仁被蒸黎則必崇奉其道而必嚴其祀殆卓軼前軌者乎今聖天子茂舉盛典於上賢有司恪遵彝憲於下廟焉以致羹牆之思學焉以困漸磨之化士生茲時何其幸與將見簪裳翹楚趨翼升學仰瞻廟貌洋洋如在親師遜友質難請益斯弦斯誦相規相勸培仁義以篤其躬泳禮樂以肄其業他日俊髦輩出選德貢藝於以周布庶列贊襄嘉猷終收效用於顯赫者斯不負朝廷期望之心與夫縣官作成之力也敢告多士其思勉哉

湫頭龍王廟碑記

李康

正統七年歲在壬戌亢陽久旱三月既望越翼日知澄城縣

澄城縣志

卷二十三

藝文二

三

楊侯季琦等憂懼齋沐設壇縣南遍禱羣神越三晝夜萬里無雲長天一色悵箕畢之有疇嘆風雨之無期訪諸父老僉謂洛河龍王神潭最靈距縣南三十餘里東西兩岸各建神祠繪像儼然敬奉虔誠其來遠矣目之曰湫頭謂其石堰天橫截水勢奔迸千里至此懸流而下衝淙迅噴也觀其潭淵廣袤石壁陡峻聳流激盪聲若雷轟風飈驟雨之勢間有雲霧虹光燭天變化萬狀凡遇旱祈禱其應如響侯聞之喜而不寐遽命載酒畀牲往祈取水鼓吹鏗鐃迎奉壇內甫三日癸丑雲乃氤氳於潭岳之上少焉霰黶乎太虛之中已而震霖如絲優渥如膏甲寅連雨乙卯又雨霑濡潤澤禾麻菽麥將枯而復甦梧檟槲棘將槁而復茂則神之妙用昭然可驗

矣夫神之格思不可度思信在乎克誠而已有其誠則有其神而龍王之神所以烜赫昭應沃萬物而活蒼生者良由楊侯心存乎誠以召之也故曰至誠感神信不誣矣按周制月令并歷代禮儀春夏早暵命有司爲民祈雨守令皆齋潔三日祈則理寃獄恤鰥寡孤獨掩骼埋胔先祈社稷七日次祈界內山林川澤能興雲雨者不雨乃祈古來有功於人者不雨則徙市禁屠殺斷傘扇造土龍雨足則報儀用酒脯醢准嘗祀皆有司行焉然則大旱祈雨從古如斯而龍王靈湫顯應一方未若今之隨禱而隨應矣茲土民庶荷戴霈澤瞻仰思服咸欲刻石用紀靈貺垂諸悠久以暴揚楊侯治民事神能盡其道焉於是乎書正統八年癸亥三月

澄城縣志

卷二十三

藝文二

四

楊公政績記

李康

正統二年丁巳交趾楊季琦蒙恩擢知澄城事覩其凡百廢墜弗稱神棲民失瞻仰仍於錢穀牒訟之暇謀諸僚佐人謀僉同著龜協吉捐俸資集羨餘命工掄材修補廢墜越明年戊午政事廳成重民事也又明年己未大成殿成尊先聖也庚申壬戌風雲雷雨社稷壇成重神明也癸亥布按分司成明倫堂成縣倉預備四倉成甲子道觀僧寺成二郎廟關王廟成凡其奉神之宮接官治民之處師儒齋宿庖廩之所吏胥廨宇舖舍之備計屋四百六楹苟完矣以其事務繁冗未遑記載慮其久遠無徵略舉各年所成之跡刻石以俟同志君子尙有考焉正統十一年三月望日儒學教諭敘南李康

撰記

重修普濟院記

龔 邁

普濟院去縣三里許環奇擁翠背山臨流誠一邑之壯觀萬年之福地佛圖澄晉神僧也乃樂水愛山卽豎宗立教直下開基振錫當尙辰鉢翻場是故結庵演沙浣泉淘腸蓋亦胚展福場未名普濟迨靈歸天竺歷世四朝經年七百凡邑逢旱澇告無不靈民羅迤邐禱無不應大觀間馮翊不雪麩麥無成太守郭長卿往求卽應歲獲豐登遂具跡上聞優承獎勵賜眞顯法師之號優工匠修飭之榮普濟院名猶寥如也未幾值大觀末詔毀無益庵院是院以功德及人之故乃蒙不毀更荷褒崇特賜普濟之額益隆修飾之工普濟之名甫澄城縣志

卷二十三

藝文二

五

昭如焉厥後官民皈崇愈篤感應愈靈由晉宋歷元迨我國朝 千年矣天順紀元僧法興念殿堂瓴甌垣墉傾欹乃勵志重修殿宇再 垣墉助緣烏集共豎津梁檀越雲合同成善果規模壯麗聳萬里觀瞻體制精奇啟十方皈仰塞神有託容像無虞官庶少憂祈求有望偉哉福地允矣嘉場天地無疆功德不朽成化丁亥知縣趙公瑾禱雨有驗慨曰神旣靈矣院豈可無記遂記云

楊公增修廟學記

長安 吉 人

其略曰朝廷知治本於教教本於孔子故於郡邑各建學以敦治化之源設廟以崇報祀之典制周海宇然廟學振弛恒視有司之臧否焉澄城爲關輔僻邑廟學始建於洪武丙辰

重修於正統庚申滋久寢敝弗支洪治庚戌雁門楊君泰來尹是邑講學行禮之初卽有志更作適陝西按察司副察巴陵楊君一清董學政按部澄城謁廟泣學觀其狹陋頽殘傳循檄葺理尹遂慨然爲已任慮材鳩傭拓地積粟用無定所取之於公贏役無常夫使之於農隙經始於洪治甲寅正月望日落成於是年十二月末旬大成殿五楹丹雘其容琉璃其甍前所未有也兩廡各十楹櫺星戟門各三間明倫堂五間其舊則易之爲講堂講堂三楹其舊則易之爲饌堂東西兩齋各五間堂後左右兩號各十間又於學之震方創建新號四連每連六間門皆石額扁曰方員平直總爲一門額其楣曰義路禮門於巽隅建神廚神庫宰牲房各三間倉廩廡

舍分置門內大門三間伉然爲邑人瞻仰廟與學咸規模宏遠足以妥神造士命工鑿井於神廚前味清且甘祭祀飲食神人共賴師生欲紀功貞珉乃徵予文夫養而不窮大易之著井也楊尹將有事於學校而先爲此井亦養而後教之意也其知爲治之序哉聖君崇儒重道副憲公祇若德意以振起斯文楊尹爲良有司又能奉承上命而作興如此彼青衿秀士仰觀新宮必思材如大木以充棟梁之需毋斲而小之爲不勝任之物俯察新井必思學如掘井及泉而後已毋九軻以自棄吾知哲人奇士當有出於其間以輔佐我皇明之治於無疆則提督提調之功亦永垂不朽矣春秋不書其常惟興作創制則備錄之重民力也此澄城廟學之所以可書

也與

劉公嘉禾碑

五泉 韓邦靖

聖主在上海內又安仕者以出入禁闈承近天顏爲榮寵而
恥居外服郡縣之職繁重勞屈若夫豪士志在速化誅索以
奉上官峻刻以要聲譽關節以求援拔庸下闖茸者率自利
而殃民吏無善治民不聊生故閭閻愁苦盜賊乃生水旱頻
興蟲蝻斯至有由然矣若夫優游之政志在恤民感天召祥
斯不遠也故予作嘉禾序云序曰正德乙亥關中澄城縣有
禾焉一本二穗或三四穗至六穗遍於野歲乃大獲澄城者
蒲郡劉子貫道之治邑也劉子之治澄城也政甚美禾之生
爲劉子也禾之生也澄城父老趙旺石秉常等數百人採之

澄城縣志

卷二十三

藝文二

七

以詣劉子曰旺等老人竊伏山林久矣前後更令長數十人
無如令者竊聞之德盛者天報之以福政善者天報之以祥
今茲異禾意者其天之所報乎夫祥之生國之福也其以上
劉子曰是烏足異氣以生物氣之所聚濃寡異類輕重異等
大小異形長短異方匪惟禾也雖草木亦有之故有並蒂之
蓮連理之木匪惟草木也雖物亦有之故有九尾之獸九首
之鳥匪惟物也雖人亦有之故有重瞳之目並肩之體皆氣
之所爲也夫氣所爲偶然耳烏足異父老日常聞之嘉禾之
書垂訓萬世有年之紀載之春秋夫周公之聖非導主以誇
孔子之書非示人以不急者謹災祥重民事也古者鬱鬱之
尊用以灌神故曰一稔二米和氣所生今日之祥何以異此

劉子曰父老愛我矣然令無德焉不足以比此父老乃歷階而上再拜進詞曰旺等山野鄙人無所知識然聞之君子矣物有所感類固相召天子修政則祥在四夷故海不揚波重譯斯至諸侯修政則祥在四境故楚王將霸厥有萍實大夫修政則祥在一家故三鱣之降楊震乃陞今之郡縣古之侯國境內之祥非令而誰夫天之所彰不可晦也民之所與不可奪也君子不引高以違衆廢天以爲異令無辭焉劉子乃大笑曰父老勞苦矣其罷休就舍古人有言貪天之功以爲己有令也敢掠天之美乎卒弗上於是父老退而相議曰吾令長者也奈何自張其在吾民乎私相刻石紀其事俾五泉韓子序之以詔來世昭令之休焉韓子曰夫循吏之致祥古澄城縣志

卷二十三

藝文二

八

有之矣張堪兩歧魯恭三異載之史籍彬彬然可考矣夫人民者天之心也故曰天視自我民視天聽自我民聽守令之職親民爲近其感名易矣子姻有李生趙生皆從劉子遊爲予道劉子治邑甚悉其化俗似文翁斷獄似廣漢催科似陽城有文武材善治兵事澄城舊苦盜畏令屏息不敢發禾之生爲不誣矣

兵憲張公延恩祠記

蒲州劉一中進士

予家蒲坂距澄城僅百里雖異省而聲跡常相聞若往年兵憲張公平寇英烈蓋已聞其概而竊慕之及承乏茲土土人亶亶傳頌而又獲其詳也先是寇酋李午挾妖術自山西入陝煽惑有年其徒若洛川邵進祿等黨寇數千謀不軌初據

虎兒溝麻線嶺剽掠縱橫建旗幟製冠袍蓄兵刃妄稱天王以白爲號遠近翕應勢遂猖獗正德壬申十月丁卯延安衛指揮陳政率衆往緝遇寇死焉戎馬器具反資其用寇自以神助明日擁衆陷洛川城脅縣令妻子殺之寇勢益熾流言自澄郃白水韓城諸路先據陝藩聞者震竦十一月辛未朔寇漸逼澄城居民逃徙奔命有立斃者邑令韓齊教諭劉佑計恐不支甲戌告援潼關兵憲張公卽日發指揮張潛關健先道丁丑發指揮彭松張良臣尾而應之各部官軍總五百其整備芻糧計料應候則同州知州王良弼同知李驥戊寅公率師直泄澄城張潛等分次白水諸路各要隘俱有伏兵寇知澄之有備也卽夜由黃龍山移營據白水彭衙寨震撼

澄城縣志

卷二十三

藝文二

九

自若張潛關健彭松由白水兩路執公令旗招諭不下乃與之角斬寇首七會大風作潛與健暨百戶王珍死之寇復逼彭松壘急風益大各收兵松馳壯士報公未及至時公已進兵次王莊鎮去寨幾五十里矣夜半忽下令命士馬盡飽食整隊亟進不知者謂公進之無故頃焉壯士至人殊異之公其有得於風候耶其間有聞不利者相對頗失色公始泣下旋卽奮然自誓以委身決敵且以死忠諭衆衆皆感且懼踴躍向赴侵晨臨寨相寇壘四空分兵環守自屯營於黃龍山之隅望寇寨猶在腹裏衆危之公先迎寨連發矢中二酋諸將士發矢如雨寇健敵不衰公命礮手架鎗礮十餘種掩於士馬尾忽開營並發火而飛矢隨之寇中傷者無算死者自

焚公曰寇已迫勢欲刎道當自我營奮出矣迺擇奇兵四百人伏於西北岡下是夜分月色皎然寇累自空踴出直衝我公命連發礮諸路將士齊至而岡下伏兵自寇尾擣之寇大潰公倡衆邀擊厥明擒殺過半復豎招降旗戒妄殺降者二百有奇斬首百四十有奇擒獲百四十有奇旗幟冠袍器械妖書不可數計翌日會師凡餘孽醜類續次斬獲殆盡自是民得息喙就生侯公凱旋羅拜道左咸曰吾今復見天日公之功也公蹙然曰爲民上者弗能先事弭變俾赤子弄兵延及良民橫罹鋒鏑而不得以天年終者方自引咎尙何以功爲衆感泣明年癸酉邑耆老趙旺石秉常田錦石仲張倉等謀曰張公於澄人有再造之功而不自處真吾父母也義不

可忘願祠而祀之遂相率殫力規祠卜邑之西南隅構堂三楹中肖公像外設門券扁曰延恩祠告成旣久衆恐磨滅而不傳復懇乞予以記予嫌以宦屬或襲奉諛之誚衆不悅曰張公遠去我侯久厯茲土吾民所以追慕懷思於張公者信非侯莫能悉也予辭不獲已予雖不識公嘗遊京師得公之大較矣公名禴字汝誠號西盤順天平谷人登洪治乙未進士初授戶部主事繼改刑部員外郎郎中當路以公才行特著推改監察御史出按山西風憲赫然尋陞大僕少卿進都察院右僉都御史巡撫山西大同鎮秉道嫉邪大著安攘之績後以猜忌謫泗州守去之日軍民遮路留者甚懇及泗時會流賊倡亂公督兵截殺地方多賴保全彼有去思之碑可

攷也今轉潼關再活關中萬命所謂志士仁人捨身消患而不自以爲功者也於戲張公之不居功也其言仁民庶之不忘德也其言義上皆能仁則何至於致寇下皆知義則何至於爲寇繼今官僚士庶悉安其分而歸於仁義焉則澄城爲善俗樂土矣予故書其美以勸因爲銘銘曰妖之虐民之瘼撲之遏澤之渥厥寢斯作厥功永焯正德十一年春三月吉朔壬午建石

重修王莊鎮肅宗寺記

張廷用

天下之事力有餘者易於爲力不足者難於舉今夫舉千鈞之重以一夫雖賁育之勇絕筋折脊不能勝其任分數人之力雖孱夫弱士攜置往來易於弄丸何也任衆者力輕積多

澄城縣志

卷二十三

藝文二

十一

者難舉其勢使然也有生之衆林立天下蚤作而晚息歲勞而日逸夫誰不欲潤其屋華其居以享宮室之美然耕織於衣食疲瘁於租役昏姻伏臘死喪疾難困頓嬰其心力有餘者百不一二視故垣敝廬懼不能喘息牖下况敢爲望外之圖哉獨浮屠氏業無常產徭籍不登其名有司不勤其力無父母之養無妻子之累偃息自如而經費仰給吾民羨積而儉用故得以肆其力於所居者天下皆然也此夫人之廬不能盡蔽風雨而佛氏之宮之侈固宜西安府同州澄城縣王莊鎮舊有浮屠宇曰肅宗寺不知始於何時按唐憲宗元和四年有僧曰道進者集本鎮居民與寓鎮商賈重修寺宇立石留記迄今昭然可驗洪治元年寺主僧人守聰計其力已

裕陋舊居欲新其敝拓其無而里人孫政者又相與助之遂創爲中殿且蓄且作逮其徒常珪嗣續其功而政之子麒麟隆姪學幹輔輩復捐貲百緡斬然規模殿宇構深齋廚安固門齋宏密金碧掩映殆非曩時安陋處簡聊爾苟且也正德十五年工訖珪曰是舉也吾與吾師殫吾力勤勤數十年乃始有成然非孫政等先後有人亦弗與畢厥志使不託於石不將泯泯矣乎因以是來請予爲其邑人勢不能辭嗚呼不能辭其請者不得已也情不已而言固與之亦所以全之也使其移是而民事焉是急則必大有可觀者予之與之滋甚矣惜其但止於是焉可慨也夫

權博施墓表

李夢陽

澄城縣志

卷二十三

藝文二

三

權濟字博施澄城縣人也其墓在縣城西十里段莊社權君蓋有男女各三男曰惟均曰惟平曰惟誠監生也女之壻曰雷頂曰許世昌曰楊復性孫九度座生員也廉庾席庇庄慶孫女六女之壻曰李朝相舉人白文魁曾孫四誥謳訓訥嘉靖四年許君以知縣陞開封府通判是時權君歿而葬者三年矣許君見李子請曰嗟舅氏窆銘矣而墓未表也敢請於執事者李子曰夫表者揚之名而勸之義也是故表死以勸生表其先以勸後也表之鄉勸鄉也勸鄉以風國也風國風天下也何也人無有不激之而興者也故表者揚之名而勸之義也許君曰嗟舅氏厥行足揚之而足勸之也足以勵生而警後足以式之鄉風之國天下矣敢以表請於執事者李

子曰夫厥行可得聞歟許君曰舅氏稼穡至孝友體無踰服口鮮過味聚而能散有而不居李子曰是勤敬儉義人也許君曰舅宗族睦間黨愛僮僕惠飲必醉醉不亂召必往往必先來必留留必款李子曰是和易平實之倫也表哉許君曰舅嘗授散官矣不冠不帶也曰吾野服逍遙人也嘗賓之鄉飲矣舅不之赴也曰吾何行而賓之鄉李子聞之乃驚曰是高人也夫自世教之衰也聞假衣冠衒俗者矣不聞其不冠不帶也聞求賓飲以欺時者矣不聞其賓之而不赴也是二者人之高也表哉夫人之好惡未有不同者也不揚不激不激不興不興不勸自是權氏子孫不有念其先者乎生者不愧於死者乎鄉之人不有慕之而效者乎是誰勸之也故曰

澄城縣志

卷二十三

藝文二

三

表死以勸生也表先以勸後也表之鄉勸鄉也自是風之國風之天下不有勤敬儉義者乎和易平實者乎又不有不衒俗不欺時者乎未必非權氏之功也按權氏世居澄城趙宋氏有爲元帥者傳至權恩恩生亨亨生通通生允申允申生士賢士賢生宗仁宗仁生定定生濟也濟娶楊氏克相其夫成厥行合葬於斯墓墓表其大者他見於銘志故不表嘉靖八年仲冬十一月吉旦

明壽官南軒趙公墓表

苑洛 韓邦奇

公諱銳字廷玉號南軒朝邑太慶關人也曾祖伯祥祖敏父興世德相紹振耀不隳興娶侯氏生公一人廣額隆準頤身美髯分稟穎徹氣宇莊卓壯遊江海旣雄蓄藏晚事田畝益

崇節儉以故若關之家公特殷富矣中年後嗣未立從父商
蘭州父爲買妾公曰子婦當娠且子中年而娶少女齒弗相
若天必不佑父弗允公遂逃歸已而果生子客江浙拾遺金
數十兩亡金郎泣尋公卽以其金還之鄉里霍某死旅邸公
爲殯斂所遺貲公攜抵家召其子一一給之迄今子之感恩
莫旣也甥張文少失所怙孃孃靡依公迎姊於家撫甥成立
遂致大富公賦性剛果言論侃侃里有爭訟者質之於公分
辨是非無所回互無不悅服又能誘人之善急人之貧拯人
之婚起人之喪凡百所爲皆義之類也邑侯知公請爲鄉飲
賓旣而膺恩詔以壽冠帶年幾八十康強不似老人一日偶
得危疾其子濟迎醫公曰人生有命貴自知足我年將八十

澄城縣志

卷二十三

藝文二

古

子孫滿前家頗完美於吾足矣苟求生活是不知命者也濟
跪泣以口啣藥哺之終不飲越三日而卒配辛孺人關之名
族閒純幽靜中饋貞吉先公十年卒公生于天順二年九月
二十八日卒于嘉靖十六年七月初八日得年七十有九孺
人生于天順元年二月初九日卒于嘉靖六年七月二十三
日得年七十子男二人曰漢娶文氏繼譚氏皆先卒曰濟秦
藩引禮娶李氏女一人適商人何吉孫男六人永和娶張氏
漢之子也永年娶王氏繼毛氏永慶娶王氏永壽聘陰氏永
熙聘黃氏永昌尙幼孫女四人淑錫適商人睦自新淑綿字
生員張士榮淑貴淑貞尙幼皆濟之子曾孫男三人承創承
家承業女一人皆幼夫世之人雖號爲學士大夫一爲利欲

所奪忘義苟得無惡於志鮮矣公蓋商名而儒行者也是宜表之墓嘉靖二十年辛丑二月吉日立石寺前鎮

重修譙樓記

韓邦奇 苑洛

古今有未遇之賢無難舉之政有不善之治無難治之民是故人存則政舉欲善則民善矣昔漢廣陵前後二千石治之者幾人而盜起張綱單車之任而盜降顧一廣陵也而修亂之異者治之者賢與不賢善與不善耳吾陝之澄城素號難治吏於茲土者多患苦之謂其地瘠而疲也謂其事劇而難也謂其民健而尚訐也夫瘠而疲則賦稅多逋欠劇而難則應酬多積滯健而訐則詞訟多誣枉是三者皆尹之要也且弗盡而况他及乎是故縣治學宮城垣凡百皆損弗緝敝也

澄城縣志

卷二十三

藝文二

七

甚矣嘉靖癸卯三齊鄭公來尹斯邑不數月逋者完滯者通訟者平且簡皆數十年之廢頽一旦振而起矣於是民和頌興邇悅遠聞乃撤譙樓而增損之曾未旬日煥然完美縣宇城門齋堂皆將次第而更新焉何昔者難而今之易人所難而公則易乎吾聞公之治澄也嚴而弗刻罰止于懲奸寬而弗縱仁止于惠良廉而弗激取止于常祿夫三者皆政之經也公兼有之况以屠龍之手爲割雞之用乎然則澄之治也又何難哉是舉也工大而弗費役省而成速下無取於里甲上無損於庫藏云公諱光溥山東益都名族京闈解元戊戌進士拜監察御史左遷今職立石而記公功者二尹金君時用也法得附書

縣堂八銘

韓邦奇

仕以行義實堅表裏象恭言僞是之日欺金石凜烈殫力矢
心體國猶家不有其身

右忠銘

當官三事精勵宜先荒隳厥謀敗乃事焉自強不息夙夜匪
懈無逸作所脫簪是戒

右勤銘

縱欲敗度甘節眞亨惟出有經其用不窮儉以律俗擯止無
益計食稱事四方作式

右節銘

人有赤子異形同氣孰謂百姓爾我不類顛連熒獨莫予之
弃視民如傷心乎愛矣

右愛銘

志士表表神明時對無日四知不欲何累苞苴無門宛然封
識白日青天風高百世

右清銘

澄城縣志

卷二十三

藝文二

六

不鑿以智不先以意廓然大公中道而立剛毅不吐柔訥不
茹無偏無僻居正以處

右正銘

日火燭焰惟光斯瑩焔明自用豐蔀其形疑深則惑察瑣生
魔彼昏不知遺奸反多

右明銘

禮戒猶豫書貴果斷風裁成幾無爲反汗蓄久成蠱積疑生
難利器盤根穎末立見

右斷銘

鄭公新修廟學記

韓邦奇

余生華嶽之下長而遊齊魯陟泰嶽遊晉代陟恒嶽遊梁豫
陟嵩嶽遊荆楚陟衡嶽歷吳越觀于甌閩足跡將遍天下凡
梵宇琳宮巍然壯麗有上擬延闕者類皆其徒自爲之迺閱
孔廟視學宮頽敗剝落甚者不庇風雨今官於郡縣者獨非

孔氏之徒與且琳梵之修建國有禁例若廟學又孰從而禁之哉侍御鄭公謫尹是邑未期年政通民和乃撤文廟學宮而重新之神有依而士有業羣情大悅於是教諭何君相訓導王君畿王君得祿率諸生韓照習朝用路雲衢來問記若公者其真孔氏之徒與余讀宋史至循良傳意其人必吁吁煦煦無所動於民也及觀其治行迺肅紀綱正法度闢四野實倉庫捕盜賊濬水渠繕城池抑兼併修武備謹置郵禮百神興學校於是歎史臣之有識也若公者得不謂之循吏也哉公之素善余已備識於譙樓記其行已立政皆孔氏之徒也豈特廟學之修而已哉使琳梵之徒見之亦將歎曰吾輩方行天下獨見鄭公耳公諱光溥字伯公號一山山東益都澄城縣志

卷二十三

藝文二

七

人起家進士嘉靖二十三年甲辰冬十月既望立石

普濟寺新修觀音閣慧光洞記

馬 徐

閣以登覽洞以休逸凡觀遊勝地必有此以爲奇或無或
缺其一皆非盡美故工畫者假此以寓其巧善詩者託此以
寫其意古今名士能文章者譽閣稱洞不一而足縣西三里
澗南古金沙谷東晉高僧佛圖澄洗腸泉之上寺曰普濟舊
無觀音閣慧光洞上人常理字性天與其徒恆潮恆清恆潮
之徒崇德始爲之因閣在寺外門上而寺門北闕也故相其
宜而肖之以觀音因洞在寺後方丈東隅而佛圖澄結菴之
遺址也故識其異而名之以慧光然而閣洞之奇非徒像與
名焉而已畫有以紆晴嵐夜有以邀明月朝有以迎曙色夕

有以納晚照有山之高有雲之浮有泉之流有鳥獸魚鼈之
遊遊凡雜然而集熙然而得足爲登覽之壯者皆是閣之奇
也春而溫煦可襲夏而酷暑可卻秋而淒風可遠冬而嚴寒
可避可酌而飲可倦而寢可沈而思可吟哦嘲咏而感慨凡
幽然而虛淵然而靜足爲休逸之快者皆是洞之奇也夫普
濟寺殿宇翬飛廊廡翼立凝翠含輝於山阿水涯之間遊者
欣慕樂愛每每眷戀而不忍舍去固邑之勝地矣復有是閣
與洞則遊而登登而休令人襟度瀟灑高趣清幽脫落於塵
埃之外視麒麟凌烟之功名將不知其爲何事而白鹿桃源
之風味亦不知其爲何物也其增重於普濟寺之勝夫豈少
哉且此普濟寺之勝皆性天師祖大雲何翠峯與性天相繼

澄城縣志

卷二十三

藝文二

六

營爲而成者也性天又與其徒營爲而成此閣洞出奇則邑
之有此寺此寺之有此閣洞自吾性天而有也否則廢壞湮
沒狐狸之室而已矣樵牧之場而已矣雖金沙谷洗腸泉亦
將泯其迹耳吾儕何所於遊何所於登何所於休耶信乎地
以人而興也自是名宦鄉賢詩家酒客幽人豪士或有至焉
得所適而樂其樂者豈不有感吾性天者乎嗚呼谷名耿耿
泉流脈脈性天之功照映綿洪實與之俱矣時監察御史益
都伯公鄭公因直言來臨是邑執政之後百廢俱興行春布
政至此適功成乃登斯閣入其洞歎美良久顧謂其僚屬曰
不可無記衆遂屬予記此云嘉靖二十三年甲辰

創修名宦鄉賢二祠申文略

徐效賢

澄城縣爲議處修補廢缺典章事竊惟治民事神地方重務如通祀山川社稷祖宗舊章近祀名宦鄉賢聖朝新典人神允賴遠近丕遵顧茲澄城獨以疲縣僻處山隅苟安鄙陋二壇則屋宇初無一木二祠則牆院訖無一抔卑職才弱識淺因循隱忍至今罪不容辭體勘得本縣儒學文廟與城隍廟前中界舊有坑壕一處曠閒無用不時勸率在官人役於閒暇時日將挑濬城壕餘土擁積填平卽今丈得平地一段東西長十丈南北五丈堪以招人置蓋房舍居處生理爰令耆老喬文宗等公同估計得共該價銀五十兩與官民通無干碍相應與人管收修補前項廢缺等因節蒙巡撫謝巡按徐提學顧等衙門批准將前地變賣價銀修補廢缺壇祀事完

澄城縣志

卷二十三

藝文二

九

申報

查議名宦鄉賢牒文略

徐效賢

看得二祠之設所以褒表前修風勵後進關係匪輕修舉雖責治於有司議論當公出於學校合行致牒該學即便會查嘉靖改元以前官政人物某人治行特異有益地方可爲名宦某人德學優長有裨風化可爲鄉賢各要擬議詳慎推舉得人使後官知勸以宜斯民於是縣有無窮之福後賢思齊有光斯土於是縣有無窮之聞無或查議不明有乖盛典

修建社學記

楊庭

天下物事久而必敝亦自然之勢也惟敝而弗補則終於敝而已矣易曰蠱元亨貴於補然則君子之責莫急於補敝洪

惟我皇明文明天下都有學郡邑有學里社有學其教人之法無非明體適用以馴其極而里社之學尤爲根本之地不可緩也故吾縣六十四里咸有社學建於各里人煙輳集之處以便童蒙趨向今皆敝而莫舉所存止與教讀之名而已惟郭下里社學在縣治前基廣二十步表倍之前繚垣以廊爲縣榜房廊之中豎扁爲社學內堂若干楹兩脇房如堂數洪治壬戌敝壞極矣濱州徐公政作縣急補之撤故更新而堂廈復翼然朔望每考課生徒提學上蔡李公遜學特注意於茲而吾縣童生動有數百不久徐公擢苑馬寺丞延今三十餘年敗壁頽垣視若邱墟邑人教子弟者不之道院而之僧寺未幾將爲土人易去歲癸卯教讀張東鄉老石光耀狀

澄城縣志

卷二十三

藝文二

三

於柏臺張公光祖下大參蒲坂張公邦教勘實復歸於官適益都一山鄭公光溥以御史謫知吾縣集材將爲修舉乙巳秋七月擢守華州迺九月上命江津徐公知吾縣視篆三日首舉學校之政而汲汲於社學掄材鳩工不一月而告成其完美弗減於昔公急於首務如此其他可覘矣或謂各里社學其不次第有舉耶而今而後小子有造由茲以熟夫灑掃應對進退之節精夫禮樂射御書數之文以臻夫成人之地豈復軼軼轉轉寄蹤跡於虛無寂滅之境又豈不有以副吾皇祖設立學校之深意與工始小春而落成於長至後五日於戲公之補敝何神速也哉大明嘉靖二十五年丙午歲仲春清明吉旦立石

徐公吏坊記

馬躍如

吏坊詳記記慎坊吏而詳及其餘也夫吏坊弗慎則弊滋弊滋斯害政斯無完吏其流至於不能官不能縣者多也澄城吏坊弊甚矣久矣房科諸不能蔽風雨架閣惟嘉靖二十一年黃冊且無整帙弊其能已矣哉廨舍圯久相率如館店散處甚至朋淫速訟弊豈不愈滋哉無惑乎無善政無完吏或者淪胥于失德而縣稱極弊也近甲辰開天乃不遺澄人泣以侍御一山鄭公式振百度政肅化行吏固不需乎坊而弊自戢矣乃乙巳夏卽遷秩越秋暮涖以几江徐公徐公首惟慎若坊以補若弊顧乃謀諸雅州楊太守庭偃師白大尹文魁合州姚判官卓德陽王主簿維翰有事於社學申明亭則

澄城縣志

卷二十三

藝文二

三

日警於邊報盡力乎教場城堡井泉而未之逮也適丁未夏麥載熟旣完葺察院分司府館與儒學門牆官舍爰始經營房科廨舍焉維時事簡信孚羣心競勸未幾房科東西翼如廨舍南北井如圖籍咸架司典比居扃鑰惟嚴罔復縱逸吏蓋截然有坊而弊無容滋矣惟九月初旁及獄禁女監預備倉養濟院將訖工則嚴霜殺稼民思悄然徐公曰吏坊飾矣茲所懇三泉諸荒田餘粒無復厚助矣於是急完馬廩姑置他弊以俟有年越己酉夏麥再熟二門適壞則撤而新之且完飭諸階阨尋立四郭門以嚴捍衛載以所緝填隙地請於諸當道分給富民令各修立社稷山川二壇及名宦鄉賢二祠成一日儒學訓導石州王畿廣昌王得祿乃令二三子約

躍如輩共登一山鄭公所爲譙樓觀厥成曰今而後政日稱善吏舉獲完與能其官而成縣俗者其胥基於吏坊之慎與肆屬躍如爲吏坊詳記於學宮是歲六月十三日鑿諸石

增修城隍廟記

石道立

予讀祭法見聖王之制祭祀也能禦大菑則祀之能捍大患則祀之蓋古者方澤祭地之外如嶽鎮海瀆以及山林川澤邱陵墳衍凡地祇之屬各有常祭矧城隍保障邦土捍衛民生功不在諸神下血食無典豈人心之所安哉故自唐以來郡縣始建祠祀其神第加以爵號雖極尊崇之意而瀆禮不經莫此爲甚國朝洪武庚戌旣正天下神號以洗前訛而郡縣厲祭又命城隍主之俾之監察善惡以通幽明實與守令

澄城縣志

卷二十二 藝文二

三

相表裏典至重也澄城城隍廟唐正元中建今所國初改建城內東南隅維是舊廟瞻依旣久衆望攸屬故歲時香火悉歸之嘉靖乙巳秋江津徐侯效賢視篆茲土祇順羣心卽舊廟修祠謁之禮顧儉陋弗稱期撤舊而廣之越三歲政通人和百廢具舉迺謀諸主簿王侯致中相與蓄材用宏規度諏日鳩工首新正殿次作前軒五楹翼以鐘鼓樓又次作後寢三楹中肖以像繚以周垣限以重門於時梓人獻奇役夫奏功輪焉奐焉視昔不啻倍蓰事旣竣督工耆老相率揖予曰夫祀國之大典也肆今廟貌嚴矣竭虔妥靈修祀秩禮徐侯之功也且財出公羨無剝下之嫌工以直備無奪時之擾不慢不虐侯茲兼之矣盍識諸予惟治民事神守土者之先務

徐侯統攝陰陽靡神不舉若城隍昭載祀典凡境內旱澇疫
癘神實默相之視他祠尤加慎焉禮也雖然幽明之際遠矣
我侯惟致力於民者盡故致力於神者詳向使勞民傷財則
土木之興適以斂怨作廟之功將曰崇諂神豈安之人其誰
永傳之哉侯之功卓卓乎其可紀矣他如葺學校以育材築
城郭以衛民名宦鄉賢有祠諸壇壝有屋崇祠祀修缺典皆
前政所未暇者於是乎並書之嘉靖二十九年二月初吉邑
人玉泉石道立記

徐公追思祠記

吳橋李懿

惟王建國設官各有分職以爲民極縣令之職掌縣治以守
縣地親縣民任至重也凡縣令生有遺愛沒有遺靈者法並

澄城縣志

卷二十三

藝文二

三

得祀澄城爲馮翊屬邑自古稱難治嘉靖乙巳秋江津徐公
效賢以才舉子知縣事不三年境內肅然稱治迺天不憖遺
以己酉歲六月卒于官於時士哭于庭民哭于野如失慈母
然旣期父老百餘人錄公治行列諸牘以祠祀請燧改情移
哀慟如新嗚呼公何修而得此哉蓋封南國之棠者思召伯
之政泣峴山之碑者追叔子之德民之請祠公之德政來之
也稽諸牘請其廉而慎也寬而肅也刑省而賦均威行而愛
立也士彬彬而民于于也祀典秩而禮樂日以興也作僞者
遠而奸慝無所容也熙然如萬物在春風中而一草一木皆
有生意恬然如江湖波靜而纖鱗巨介各安其所公生而澤
民如此誠所謂盛德必百世祀者哉父老述公未卒之前兩

月常謂人曰吾生爲縣令不負於民死必爲城隍何負於我
卒之夕人杲夢公戎冠緋袍入廟侍衛森然階下羅數十人
如刑獄考訊之狀嗚呼公生而正直沒而靈神理所必有安
知他日不能驚動禍福人哉昔桐鄉之祀朱邑親之也羅池
之祀柳子厚神之也今澄人祀公於二義實兼之先是預備
倉有隙地公鑿井以利民汲今之祠適奠其中民飲公德殆
源源不竭乎時知縣敖佐主簿王致中咸有志於公者工藝
並程規緒用緝尋復以祠記請始余領鄉薦公實與進焉義
不可以避嫌謝敬屬管城子紀之夫彰善者陳軌振德者廣
訓則斯祠也又將以風有位焉茲余之意也詩之教也春秋
之法也君子幸毋曰私哉嘉靖二十九年歲次庚戌冬十月

澄城縣志

卷二十三

藝文二

一

穀且立石

補遺

澄城縣修建學城記

韓邦奇

澄城縣儒學設縣城西荒野之地平時固已處非其所矣乃
癸丑歲山匪大舉深入寇掠廊廡聲言欲犯馮翊遠近震恐
諸生奔入城內散遊雜處離羣索居無復濟濟之美也大尹
程君言之撫臣請卽故學城西北二面築城衛之撫臣下之
兵道兵道復檄下尹君君委之丞潘君計丈數揣高低度厚
薄計徒備三月告成敦諭劉君富訓導王君廷弼鄭君鏡介
生員楊子木許子世奎孫子嘉賓來問記夫學校重地也教
化大務也三代盛時國有學鄉有庠有序有校家有塾內而

公卿大夫三士外而方伯連帥尹宰胥出於是我國家尤加
崇重庠序學校一視三代雖沿邊沿海衛所無民之地亦皆
建學立師此外又有武學上自三師三爵至守令萬戶而下
莫不由之可謂盛矣革除中罷北土學校文祖復之嘗曰長
才大器皆出北方夫以學校之設其重如此文祖垂情如此
是故天下學校皆城中擇勝地而爲之而澄之學乃在城外
夫豈可乎論語曰百工居肆以成其事百工小務也尚不可
不專其地況儒道之大學校之重乎尹君之建作顧不躋歟
然此特學之地耳究其實又有進於是者明善以立其端誠
身以克其實治平以達其用爲公卿爲三師則經天緯地以
華其文爲連帥爲三爵則傾否靖難以耀其武以至爲守爲

令則生養教訓致循良之治斯有以光重儒道克稱學生之
名矣苟徒遊心翰墨役志寵榮則雖連翩科甲金紫萬鍾飾
輸轅耳其於古今建學之意文祖睿念之望豈不深負哉城
西北二面四百六十步高二丈五尺下濶二丈下有門闌上
有女牆南臨深塹程尹名尙儒四州岳池人鄉試文魁治澄
善政多矣不能盡書卽建城一節餘可類推也潘丞名清直
隸涿鹿人貢士時嘉靖三十四年乙卯冬十月廿旦

奉政大夫承天府同知許公墓表

韓邦奇

公宏治甲子舉人歷任承天府同知卒于官父拙庵翁與我
先君同登成化戊戌進士公又我省試同年蓋世好也乃爲
之表其墓公諱世昌字順德號東崖姓許氏陝之澄城人拙

庵翁諱英歷官至刑部郎中母楊太宜人公幼孤鮮兄弟伯叔既長勵志勤學比登鄉試尤日孳孳屢試南宮竟不第以太宜人老謁選吏部授太和知縣迎母就養知縣七年太和
大治爲諸邑最都院使院使奏書旌之章凡五上省平章行御史臺諸司下檄獎之者三十二于是拙庵翁贈奉議大夫楊太宜人亦獲封嘉靖乙酉轉開封府判捕盜不期年地方
寧謐院使又旌之丁亥陞順慶府同知起程日沐父老遮道拜送抵順慶適廣安賊勢猖獗殺官吏攻城甚急公領民兵
直抵廣安圍乃解蜀穀不熟而廣安饑尤甚死散者甚衆公夙夜圖賑救之策賴以活者千計民乏種及牛具公告于當
道給種買牛而荒蕪闢矣府素苦水城屢崩民且歲苦修役

澄城縣志

卷二十三

藝文二

三

院使者召公圖之乃開渠西山以泄水而患息院使大加稱重命立石紀其功委署涪州小河一帶盜賊蜂起公奉檄勦
平都院使設太平宴以勞之且上其功賞白金二十兩公念太宜人年高蜀道險遠不能迎養懇疏陳情終養及太宜人
病公奉湯藥夜不解衣及卒哀毀踰禮三年不越戶限服既闋且皇皇然如新喪復除承天府公益勵清操盡心職務車
駕南巡公適署府事百責艱大夙夜奔勞至于昏斃復蘇者幾時又改修陵寢開築城池建立觀廟添設司衛皆取辦于
府兩院使方列牘共薦而公因勞遘疾不起矣兩院使諸司
憫公廉貧卒于王事各給傳騎送抵家公生于成化戊戌三
月十五日卒于嘉靖庚子四月三十日享年六十三歲公姿

容秀整沈毅敏達強學修行衆方以大科顯仕望之及人仕前後旌獎幾四十章而竟止于是是固南宮失選銓曹論恪也而其享年亦竟止下壽天亦不可恃與謂之何哉

邑庠生党公墓志銘

路車

邑庠生党公卒在嘉靖乙未三月初一日越隆慶壬申八月十三日配孺人韓氏卒卜以是歲十月十七日啟公之壙合葬祖塋之左孤孫可大持叔翁庠生苗狀託車爲銘車與公子徐川君締姻時徐川先孺人二年卒茲孤孫善成先志而車願以銘也按狀公諱若虛字君實世家澄城之南鄉高祖某曾祖仁舉鄉賓祖衷完縣司訓親終廬墓有司奏聞表其閭父守經號平原先爲蒲州司訓歷徐溝陞陵川學諭庭教

澄城縣志

卷二十三

藝文二

七

甚嚴生公兄弟凡四公居長次若愚若水若谷俱邑庠生惜志未竟相繼而卒公之生也器宇宏沈聰睿出人弱冠補邑庠生苦志淵學直欲鵬立大事業於天下卽拾青紫爲餘事也弗意天奪之速蚤乘箕焉時遺孤爲徐川君尙年髫齡別孺人幼寡痛不可言孺人韓氏正德庚午舉人相女比歸公事親相夫居然有懿範自三十餘歲孀居迄卒之歲蓋幾四十年苦堅之節足以欺金石而傲冰霜篤孝舅姑則終始弗替睦讓妯娌則少長皆宜撫育遺孤而受侮浮浮者卽古之揮鄰和熊者不少讓也後徐川君果登嘉靖乙卯賢書已而思孺人老就祿養焉先投故城尹繼改東鄉尹方擬迎養焉人無何感疾於官易簣之時惓惓惟母爲念訃聞之日孺人

惟子爲戚顛痛之慘泣山川而悲草木痛又何言越二年孺人卒卜葬期迺得母子同日發引嗚呼向也乞翁必爲妻子不瞑目子必爲母老不瞑目母之生能爲夫與子戚一日隨柩同歸公也孺人也徐川也九原之心共斯慰乎公之生爲宏治八年十一月初八日比卒壽若干孺人生爲宏治十年十一月十七日比卒爲壽七十有九子一卽徐川君諱田娶姚氏孫男子一可大娶李氏庠生源清女孫女三長適邵陽劉某次適同州賈某三許聘車仲子從度重孫男子某重孫女一俱幼銘曰天生哲人卓犖匪常胡弗亨之蚤斂其芳惟配之賢凌冰媿霜撫孤儻拔顯親名揚厥孫漸立桂蘭其香於昭惟神佑啟無疆

